

## **Resolutioun vum SNE/CGFP zur Aféierung vum e-Bichelchen**

De 7. Juli 2022 huet den Educatiounsminister an enger Pressekonferenz dat neit Konzept vun der Hausaufgabenhëllef virgestallt, dat jo ab dëser Rentrée ëmgesat gëtt.

Am Kader vun der flächendeckender Hausaufgabenhëllef soll dat sougenannten e-Bichelchen d'Kommunikatioun tëschent der Schoul, der Maison relais an den Elteren assuréieren.

D'Enseignanten, d'Educateuren, d'Elteren, mee och d'Kand selwer hunn Accès op dëst digitaalt Hausaufgabenheft.

Fir den SNE/CGFP ass eng gutt Kommunikatioun tëschent der Schoul, der Maison relais an der Famill vu grousser Wichtigkeet, an dat och a Punkto Hausaufgaben.

Mee wien elo mengt, dës Kommunikatioun wär bei den Hausaufgabe bis elo inexistent gewiescht, deen iert sech gewalteg.

Jo, och scho virun dësem Schouljoer huet d'Léierpersonal mat der Maison relais an der Famill iwver divers Kanäl matenee kommunizéiert. Iwwert wéi ee Kanal dat geschitt, dat ass an den Ae vum SNE/CGFP net relevant.

Firwat solle funktionéierend, iwver Jore bewäerte Kommunikatiounsweeër tëschent der Schoul an den anere Schoulpartner elo op eemol ofgeschafft ginn, nëmme fir engem e-Bichelche Plaz ze maachen?

Dem Enseignant muss et fräigestallt bleiwen, op wéi eng Manéier hie mat den Elteren an der Maison relais kommunizéiere wëllt, net nëmme dëst Joer, mee och an Zukunft.

Niewent der Tatsaach, dass an eise Schoule schonn aner erproufte Kommunikatiounsweeër mat den Elteren an der Maison relais existéieren, ginn et an den Ae vum SNE/CGFP awer nach genuch aner Argumenter, déi géint en obligatoreschen, generaliséierten a flächendeckende Gebrauch vum e-Bichelche schwätzen.

- Deresponsabiliséierung vum Kand

Beim Gebrauch vun engem klasseschen Hausaufgabenheftchen huet den Enseignant d'Hausaufgab entweder un d'Tafel geschriwwen oder diktéiert an et ass dem Kand seng Verantwortung, dat anzedroen. D'Kand ass vun Ufank un agebonnen a muss Responsabilitéit iwwerhuelen. Nëmmen esou gi wichteg transversal Kompetenze gefërdert an d'Kanner kënnen zu autonome Schüler eruwuessen.

- Ass déi fortschreitend Digitaliséierung néideg fir d'Kanner aus dem Enseignement fondamental?

Et ass dem SNE/CGFP wuel bewosst, dass déi digital Medien an eiser Gesellschaft ëmmer méi u Wichtigkeet gewannen. D'Fro stellt sech awer a wéi engem Mooss an ab wéi engem Alter d'Kanner mat digitalen Inhalter an Outile konfrontéiert solle ginn. Besonnesch bei klengen Kanner féieren d'Experten ëmmer erëm un, digital Medie «mat Beduecht» anzusetzen, zemoools déi och oft mat Gefore verbonne sinn. An deem Alter spillen och nach aner Kompetenzen eng Roll, déi et gëllt ze entwéckelen. An den Ae vum SNE/CGFP gehéiert dat handschrëftlecht Schreiwen zu de Grondkompetenze vum «Enseignement fondamental». D'Entwécklung vun der Handschrëft geschitt och iwwert kleng Tâchen, déi d'Kand reegelméisseg a sengem Alldag erleedegt.

No dëse staarken Argumenter, déi géint en obligatoreschen Asaz vum e-Bichelchen an de Grondschoule schwätzen, ass den SNE/CGFP awer bereet, mat op de Wee vun engem fakultative Gebrauch vum e-Bichelchen ze goe fir déi Enseignanten, déi mam e-Bichelche wëlle schaffen.

An deem Zesammenhang bedauert den SNE/CGFP, dass d'e-Bichelchen

net während enger gewässer Zäit an engem Pilotprojet erprouft ginn ass mam Zil eng Partie Kannerkrankheeten ze eliminéieren an de Gebrauch ze vereinfachen.

D'Fuerderunge vum SNE/CGFP si kloer:

**De Gebrauch vum e-Bichelchen däerf net zu engem méi groussen administrativen an zäitintensiven Opwand féieren.**

D'e-Bichelche soll derzou déngen, d'Aufgaben un d'Schoulpartner ze kommunizéieren a soll sech och dorobber limitéieren. D'Handhabung vum Outil muss esou einfach wéi méiglech gehale ginn. Et misst zum Beispill och méiglech sinn de Wocheplang als PDF eropzelueden, ouni mussen all Aufgab eenzel all Dag anzedroen.

**Den Zougang zum e-Bichelche muss fir all Concernéierte garantéiert sinn.**

Ass et wierklech realistesch dovun auszegoen, dass jiddereen iwwert dat néidegt informatesch Material verfüügt, fir Zougang zum e-Bichelchen ze hunn? Des Weidere muss ee sech d'Fro stellen, ob d'Contenuen, déi am e-Bichelche stinn, wierklech esou sensibel sinn, dass ee se esou staark securiséiere muss?

**Op Grond vun all dësen Argumenter fuerdert den SNE/CGFP, dass de Gebrauch vum e-Bichelchen och an Zukunft fakultativ bleiwe muss.**

Dem Enseignant muss et fräigestallt bleiwen, op wéi eng Manéier hie mat den Elteren an der Maison relais kommunizéiere wëllt a wéi hie seng Schüler an dëse Prozess mat abanne wëllt, an dat net nëmmen dëst Joer, mee och an Zukunft.

Dës Resolutioun gouf den 11. Oktober 2022 vun der Assemblée des Délégués vum SNE/CGFP ugeholl.